




ՀԱՅՐԱՊԵՏԱԿԱՆ ՊԱՏԳԱՄ ԱՊՐԻԼԵԱՆ ԵՂԵՌՆԻ 80-ԱՄԵԱԿԻ ԱՌԹԻԻ

Սիրեցեալ զաւակունք Հայոց Սուրբ Եկեղեցոյ և որդիք Հայկազնեայք. Սուրբ Յարութեան տօնի յաջորդող Մեռելոցի օրն է այսօր: Հայաստանեայց Եկեղեցու Մայր Աթոռ Սուրբ Էջմիածնի սրբադրոշմ վեհաՎայրից ենք ուղղում Մեր խօսքը հայ ժողովրդի բոլոր զաւակներիդ ուր էլ լինէք, Մայր Հայրենիքում, Արցախում կամ արտասահմանում:

Երէկ Զատիկ էր. գերազանց ցնծութեան օր, մեր Տիրոջ՝ Յիսուսի Քրիստոսի Յարութեամբը մահուան վրայ տարուած յաղթանակի պատճառած հոգեկան բերկրանքովը զեղուն:

Յառաջիկայ երկուշաբթի Ապրիլ 24 է. 1915 թուի Ապրիլեան եղեռնի մեր նահատակների յիշատակի ոգեկոչման և պանծացման օր: Այս տարի մանաւանդ, Մեծ եղեռնի 80-ամեակի հանգրուանի առաջ ենք կանգնած, ինչ որ իրաւաստուկ և բացառիկ նշանակութիւն ունի մեր վերաբերմունքի համար հանդէպ հայութեան դէմ գործուած ցեղասպանութեան և նրան զոհ գնացած մեր անմոռանալի և անմահ նահատակներին, առաւել քան մէկ և կէս միլիոն զոհերին:

Այս բոլորի միջից ի յայտ եկող և մեր մտասկեռումի առարկայ դառնալիք երկոյթը կեանքի և մահուան իրադութիւնն է: Ապրիլեան եղեռնի օրերին Օսմանեան կայսրութեան ժառանգորդ Իթթիհատական Թուրքիան մահուան սև ուրուականը փորձեց տարածել ողջ հայութեան վրայ, մեր Հայաստան աշխարհից ի սպառ արմատախիլ անելու համար մեր ժողովրդին և վերջակէտ դնելու հայ ազգի գոյութեան: Ցեղասպանութեան առաջին ոճրային արարքն էր, որ այսպէս կատարուեւ էր քսաներորդ դարի սկզբին ողջ մարդկութեան կեանքում:

Շատեր, անհատներ, ազգեր և պետութիւններ, խորհեցին որ հայութեան բնաջնջումը իրականացել էր և գերեզմանի քարը դրուել՝ հայ ժողովրդի գոյութեան վրայ:

Բայց յարութեան զօրութիւնը մի անգամ ևս վերջայտնուեց. մահա-
սփիւռ ջարդերից դուրս եկաւ մեր ազգը ու նոր կեանքով սկսեց տրոփել
նրա սիրտը: Համաշխարհային Առաջին պատերազմի աւարտին 1918 թուին
Սարտարապատեան հերոսական ոգով տարուած գոյապայքարը պսակուեց
Հայաստանի մի կարևոր մասի ազատագրումովը և Անկախ Հանրապետու-
թեան հռչակումովը Մայիսի 28-ին:

Ծիշդ է, որ կարճ տևեց այդ անկախութիւնը: Խեղդուեց հայութեան ա-
զատութիւնը: Բայց ազատութեան և անկախութեան, ազգային ինքնիշխան
գոյութեան կամքը մնաց տոկուն և առողջ: Եվ ահա եօթանասուն տարիներ
յետոյ, երբ միջազգային դէպքերն և կացութիւնները տարբեր ընթացք ու-
նեցան, այդ կամքը վերստին պոռթկաց մեր Մայր Հայրենիքում այս ան-
գամ Ղարաբաղեան ազատատենչ շնչով, և պսակուեց Հայաստանի անկախ
Հանրապետութեան հռչակումով ու եռագոյն դրօշի վերստին ծածանումով
1991 թուի Սեպտեմբերի 21-ին:

Արտասահմանում ապրող հայութիւնը իր ազգային-եկեղեցական կեան-
քով, իր կրթական ու մշակութային օճախներով և իր ազգային քաղաքա-
կան կազմակերպութիւններով 1915-ի ցեղասպանութիւնից դուրս եկաւ վե-
րապրումի և հայկական ազգային ինքնութեան պահպանումի յարատևողա-
կան սխրալի ջանքերով, միշտ ինք իրեն հաղորդ պահելով Հայաստանի
ժողովրդին հետ և հայ ազգի իրաւունքների ձայնը մշտաբարբառ հնչեց-
նելով ողջ աշխարհում:

* * *

Ներկայումս մենք գտնուում ենք նոր, յուսալից և նպատակաւաց իրա-
դրութեան առջև: Ամենէն մեծ, կենտրոնական, անկիւնադարձային նշանա-
կութիւն ունեցող իրականութիւնը մեր Մայր Հայրենիքի անկախ Հանրա-
պետութիւնն է, որի հռչակման, ամրացման և զօրացման համար անգնա-
հատելի զոհողութիւններ են մատուցուել և մատուցում հայրենի նորակազմ
պետութեան և մեր ժողովրդի զաւակների կողմից, անխտիր: Կերպարա-
նափոխում է մեր կեանքը թէ՛ հայրենիքում և թէ՛ արտասահմանում:

Ապրիլեան եղեռնի 80-ամեակը մեզ առաջնորդում է դէպի մի հիմ-
նական գաղափարական, որի իրականացումը մեր կեանքում մեր բոլորի
սրբազան պարտքն է: Այդ հրամայականն ու իտէալը մեր կեանքով ու աշ-
խատանքով արտայայտելի միութիւնն է ու միասնական գործելակերպը:
Մեր զօրութեան աղբիւրն է այս, մեր բոլորի նշանաբանը, լինի դա Եկե-
ղեցում, լինի հայրենիքում, լինի արտասահմանում: Ժամն է համատեղման:
Պահն է ներդաշնակ գործունէութեան մէկ Եկեղեցի, մէկ հայրենիք, մէկ
պետութիւն կարգախօսի ներքև:

Սիրելիք, Ապրիլեան եղեռնի ցեղասպանութեան օրերին մեր թշնամին
ո՛չ մի զատորոշում չդրեց մեր ժողովրդի զաւակների միջև: Ո՛չ դաւանա-
բանական, ո՛չ գաղափարաբանական և ո՛չ դասակարգային խտրութիւն
դրուեց մահուան գործադրման մէջ: Մահը միացրեց բոլոր հայերին: Այժմ
ժամանակն է որ կեանքը մեզ միացնի Հայկեան յարութեան այս նոր առա-
ւօտին:

Այդ միութեան զօրութեամբ է որ մենք կարող կը լինենք մեր ազգի
դէմ գործուած ցեղասպանութեան անարդարութիւնը ճանաչել տալ ողջ աշ-

խարհին և արդարության մեր իրաւունքը, որպէս սուրբ կտակ մեր նահատակներին, ընդունել տալ բոլոր ազգերին:

*
*
*

Ապրիլեան եղեռնի մեր նահատակները իրենց ողջ գոյութեամբը հատացին և հետևեցին այն ճշմարտութեան որ Քրիստոս Իր կեանքով և խօսքով փոխանցեց ողջ մարդկութեանը. «Մի՛ երկնչիք յայնցանէ որք սպանանեն զմարմին, և զոգի ոչ կարեն սպանանել» (ՄԱՏԹ. Ժ 28): Ոգին է կենդանարար: Ներկայումս մենք կոչուած ենք այդ ոգին պահելու առողջ և գործօն՝ մեր ողջ կեանքում: Այդ ոգին ուրիշ միջոց չունի ինք իրեն արտայայտելու, բայց միայն միացեալ ջանքերով և զոհաբերակա՛ն գործնական եղանակներով: Հայրենասիրութեան փորձաքարը հայրենաշինութիւնն է:

Լսեցէ՛ք այս ձայնը Ս. Էջմիածնից, ձեր բոլորի Մայր եղող Աթոռից: Այստեղ շինուեց «լուսոյ խորանը», «այստեղից ծագեց մեզ համար լոյսը ի Հայաստան աշխարհի»: Այդ լոյսը մէկ է մեզ համար ուր էլ մենք լինենք:

Մեր Եկեղեցու Նուիրապետական բոլոր Աթոռներով, Հայաստանում և արտաշխարհում տարածուած բոլոր եկեղեցական թեմերով և ազգային, քաղաքական և այլ կարգի կազմակերպութիւններով բոլորուենք մեր Անկախ Հանրապետութեան շուրջ, որպէսզի առաւել ևս ուժգնութեամբ ապրենք յարութեան նորաբոյր շունչը մեր ողջ ազգի կեանքում, որպէսզի, առաւել հարազատութեամբ զգանք նահատակների անմեռ, կենսատու և միազանգիշ ոգին վասն փառաց Աստուծոյ, վասն ծառայութեան հանուր մարդկութեան և վասն յաւերժութեան ազգիս հայոց. Ամէն:

ԳԱՐԵԳԻՆ Ա.

ԿԱԹՈՂԻԿՈՍ ԱՄԵՆԱՅՆ ՀԱՅՈՑ

Ս. Էջմիածին,
17 Ապրիլ 1995

